

Кимгаки яхшилик илинсам...



11:00 / 09.11.2020 2140

Аллоҳ таоло бизни Ўзига ибодат қилишимиз учун яратган ва бу йўлда бизга Муҳаммад соллалоҳу алайҳи васалламни гўзал ўрнатқилган. Дарҳақиқат, деярли ҳаммамиз шу сўзларни ёддан биламиз, ўқиймиз, ёд олганмиз. Аммо шу сўзлар бизга таъсирни кўрсатиши, ҳар доим фикру ёдимизда бўлиб туриши учун уларнинг маъносини чуқур англашимиз ва ҳис қилишимиз, илм билан мустаҳкамлаб олишимиз керак.

Бир неча йиллар муқаддам, динимни мукамал ўрганишга, ўзимнинг вазифаларимни англашга эҳтиёж сездим. Аллоҳ таолонинг марҳамати ила қўлимга «Мўминнинг меърожи» номли китоб тушди. Сувга ташна кишидай ўқий бошладим, ҳар бир сўз ўзига мос ўринда танлаб ишлатилган ва намоз ибодати ҳақида муфассал ёритилган бу китоб муаллифига қизиқдим.

Шайх Муҳаммад Содиқ Муҳаммад Юсуф...

Ҳаётимнинг 180 даражага бурилиб, ўзгаришига сабабчи бўлган, мен ҳар гал илмга муҳтожлик сезганимда китобларига юзланадиган, тушларимга кирадиган инсон...

Аллоҳ у зотдан рози бўлсин. Кунлар ўтгани сайин, бу инсоннинг илмий меросларини, у кишининг шахсий сифатларини яхшилаб ўрганишга, уларнинг сўзлари ва амалларидан ибрат олишга интилардим. Ҳайратдан лол эдим, китобга бўлган бунчалик муҳаббат, Исломни инсонларга етказиш учун тинмай қилинган меҳнат ва унинг самарасини кўрсатиши ортида қандай сир борлигига қизиқардим.

Бугун шуни англадимки, Ҳазратнинг энг катта ибрат манбалари, илм чашмалари Аллоҳга ҳақиқий тақво ва таваккул билан суянганларидан, Муҳаммад соллаллоҳу алайҳи васалламга содиқ бўлганларидан экан. Гўёки исмларининг ҳам Муҳаммад Содиқ эканлиги бежиз эмасдек...

Ҳа, менинг тамомила бошқа инсонга айланишимда, устознинг ҳиссалари жудаям катта. Мен у кишини вафотларидан кейин таниган бўлсам-да, у зот мен учун таълим берган, Аллоҳнинг розилигини топишга ундаган устозлар.

Ҳозир ҳам ёнимда у кишининг бир китоблари мутолаа қилишимни кутиб турибди.

Устознинг ҳаётларида шунчалик барака бўлган эканки, улар ёзган китобларни мана неча йилдирки, ҳалиям ўқиб тугатишга улгурмаяпман.

Ҳа, Аллоҳ таоло менга шундай маънавий Устоз насиб этганидан, беҳад мамнунман, шукр қиламан. Кимгаки яхшилик илинсам, унга албатта, Ҳазратнинг китобларидан совға қилишга ҳаракат қиламан.

Аслида ёзмоқчи бўлган сўзларимнинг кўпи қалбимда ва дуоларимда қолди. Сиз азизларга эса шуни таъкидламоқчиманки, илм олишдан ҳеч қачон тўхтаманг, уни фурсати келганда, саҳиҳ манбалардан ўрганинг. Зеро, илм инсонни азиз қилади, Аллоҳга яқин бўлишига, жаннатда Унинг жамолига мушарраф бўлишга элтади.

Солиҳа Зариф қизи

«Ҳилол» журналининг 10(19) сонидан